



Sitzung vom

29 d'avust 2017

Mitgeteilt den

30 d'avust 2017

Protokoll Nr.

757

Dumonda Caduff

concernent la digitalisaziun d'inventaris statals da fotografias

Resposta da la regenza

Per dar ina resposta a la tematica tractada en la dumonda èn decisivas oravant tut las disposiziuns da la lescha davart la gestiun da documents e l'archivaziun dals 28 d'avust 2015 (LGDA; DG 490.000) sco er da l'ordinaziun tar la lescha davart la gestiun da documents e l'archivaziun dals 22 da december 2015 (OGDA; DG 490.010). L'incumbensa d'archivaziun per las autoritads chantunalas vegn realisada da l'archiv dal stadi. Las archivalias, spezialmain er ils inventaris fotografics da l'archiv dal stadi sco er d'auters archivs dal maun public, han – ultra da la funcziun da segirar il dretg – er ina valor culturala considerabla.

Ils ultims onns èn vegnidas fundadas en il Grischun supplementarmain differentas instituziuns privatas che rimnan inventaris fotografics prezios e che als mettan a disposiziun a la publicitad en l'internet. Ultra da la Fundaziun da fotografias dal Grischun menziunada en la dumonda è quai per exempel l'Institut dal Dicziunari rumantsch grischun. En vista a quests fatgs respunda la regenza las dumondas concretas sco suonda:

Tar la dumonda 1: Entant ch'ils documents incl. fotografias vegnan duvrads tar in post da servetsch da l'administraziun chantunala, decida quel sez, en tge furma ch'el dovra actas, documents u er material fotografic. En il rom da sias cumpetenzas e da sias pussaivladads finanzialas po el p.ex. laschar digitalisar fotografias analogas. La proprietad dals documents, la suveranità da las datas ed ils dretgs d'autur ston però restar tar il chantun.

Per archivar documents che las autoritads chantunalas na dovran betg pli è tenor la LGDA cumpetent l'archiv dal stadi. Da sias incumbensas centralas fa p.ex. er part la "intermediaziun", q.v.d. il render accessibel, la disponibilitad e la preschentaziun da las archivalias (meds da tschertga, sala da lectura, cussegliaziun da la clientella, sustegn da la perscrutaziun).

Igl è incontestà che las aspectativas a l'utilisaziun èn sa midadas fermamain pervia da las pussaivladads actualas da la digitalisaziun. Perquai lascha er l'archiv dal stadi

digitalisar ils inventaris en il rom da sias pussaivladads finanzialas. Sco en auters archivs professionals duain ils proxims onns vegnir messas a disposiziun archivalias (er material fotografic) pli e pli savens online. La tecnologia per quai è avant maun grazia al release dal sistem d'infurmaziun d'archiv ch'è vegnì introduci actualmain.

In'obligaziun da l'archiv dal stadi (u schizunt da tut ils archivs publics) da stuair surlaschar inventaris er ad instituziuns privatas, per che quels possian vegnir preschentads, n'exista betg.

Tar la dumonda 2: Gea. Inventaris privats vegnan surpigliads cun contracts da donaziun u da deposit. Tals inventaris dastgan vegnir surdads ad in'ulteriura instituziun per la preschentaziun mo, sche quai è previs en ils contracts respectivs.

Tar la dumonda 3: Igl è pussaivel ch'ina instituziun depositescha ses inventaris en l'archiv dal stadi. En quest cas è l'instituziun libra da preschentar senza l'inventari uschia, sco ch'ella chatta che quai saja bun.

Tar las dumondas 4 e 5: Ozendi vegni spetgà dals archivs dal maun public ch'els mettian a disposiziun meds da tschertga ed – en il cas ideal – er archivalias en furma digitala. Pervia da quai vegn ina part dal preventiv da l'uffizi da cultura duvrada per digitalisaziuns. Quellas servan en spezial er a segirar ils inventaris ed han remplazzà ils microfilms che vegnivan fatgs pli baud.

I dat in consens ch'i existan – gist en il sector da la fotografia e da las medias audiovisualas – blers bains culturals ch'èn degns da vegnir mantegnids e che na pon betg vegnir tegnids en salv mo dals archivs publics. Ina instituziun sco la Fundaziun da fotografias dal Grischun chatta qua perquai in vast champ d'activad. Ultra da quai èsi imaginabel en il cas singul che material fotografic, che na vegn betg pli duvrà dals posts da servetsch e che na po betg vegnir deposità en l'archiv dal stadi, po vegnir – resguardond la protecziun da datas ed ils dretgs d'autur – mess a disposiziun ad instituziuns privatas.

Tar la dumonda 6: Sch'i vegnan offrids a l'archiv dal stadi inventaris privats ch'el na po betg surpigliar per differents motivs, renviescha el ils offerents ad autras instituziuns privatas adequatas (archivs culturals, posts da documentaziun, archivs communal, la Fundaziun da fotografias dal Grischun ed auters).



En num da la regenza

La presidenta:

B. Janom Steiner

Il chancelier:

Daniel Spadin